

Lag'é Sa E'n Tin Salú?

Maske e reglanan no ta skirbí, nos tur sa kon pa hunga e wega,. Ora un persona no tin salú, dòkter ta bisa e famia. E famia por laga otro hende sa, ma ta skonde e bèrdat pa e enfermo. Djei, tur hende ta hunga komedia ku e enfermo, keriendo ku nan ta hasi e enfermo un fabor. Nan tin e idea ku e bèrdat lo duna e enfermo un shòk ku e no por suportá...ku e lo muri promé ku tempu.

Maske e intenshon ta bon, tòg nos tin pregunta si loke nos ta hasi ta korekto.

Para ketu pensa un ratu. Si bo no tin salú, lo bo deseá pa sa? Hopi hende sigur lo ke sa. Henter bo bida, “doño di kurpa” a hasi desishonnan ku a regardá bo mes salú. Ma ora ta regardá e enfermedat mas serio di bo bida, “doño di kurpa” ni sa mes? Si abo ta un ku lo ke sa ora bo no tin salú, anto ta “fair” pa disidí pa e enfermo ku lo skonde e bèrdat p'é?

I kiko di nos mentiranan pa skonde e bèrdat? E intenshon por ta bon; tòg gañamentu ta piká. Dios ta bisa, “...poniendo mentira un banda, kada un di boso papia bèrdat ku su próhimo” (Efesionan 4:25). Sin duda, tin kaso ku no ta prudente pa bisa e enfermo tur kos. Ma no gañá! **Komuniká e bèrdat ku táktika.** “...papiando e bèrdat den amor...” (Efesionan 4:15).

Un otro konsiderashon: Ora bo keda sin bisa un enfermo di su kondishon, bo ta kita di dje su oportunitat pa prepará pa muri. Kiko ta algun preparashon ku e enfermo lo ke hasi?

1) Por tin kos e enfermo ta deseá pa regla promé ku e fayesé. Talbes e enfermo tabata esun ku a sòru pa finansa, dokumentonan, èts. di e famia. E lo ke splika su kasá tokante su seguro di bida, finansa, debenan, plannan pa futuro, penshon, èts. Kisas e ta deseá pa prepará su tètament. (Un tètament ta un yudansa enorme! Hopi problema familiar ta okashoná pa falta di un tètament.) Tin ora e enfermo ta preokupá pa futuro di e yunan chikitu i e lo ke regla ken lo kuida nan ora e no t'ei mas.

2) Por tin kos ku e enfermo lo deseá pa bisa promé ku e muri. Kisas e tin un klèsh ku un pèrsona i e ke muri na pas, sabiendo ku el a wòrdu pordoná. Hopi bes un persona ku sa ku e ta muri ke bisa su kasá òf yunan algu. Talbes e ke hasi algu ku su yunan chikitu pa nan por kòrd'é. Tin mayor ku ke duna un konseho òf spiertamentu na un òf mas yu. Sigur e enfermo ke komuniká su amor na su kasá i yunan.

Pa keda sin bisa e enfermo di su kondishon grave, talbes ta rob'é di algun momentu presioso ku e por tin ku su sernan kerí i kisas ta roba bo mes di memorianan presioso.

3) Por tin preparashon spiritual ku e enfermo ta deseá pa hasi promé ku e mester enkontrá Dios.

Preparashon spiritual ta masha importansia pa e enfermo. Si e ta konfia Hesu-Kristo so pa salbashon, Dios Su presensia ta dun'é forsa pa enfrentá morto. E por tin siguransa: “Maske mi kana den e vaye di sombra di morto, mi no tin miedu di maldat, pasobra Abo ta ku mi...” (Salmo 23:4).

Ademas, konfiando Kristo so pa salbashon ta duna speransa mientras e ta enfrentá morto. Un motibu hende tin miedu pa muri ta pasobra nan no sa kiko ta sosodé despues di morto. Ma Hesus a bisa esnan ku ta konfi'E pa salbashon, “Mi ta bai i prepará un lugá pa boso. I...lo Mi bin atrobe i risibí boso serka Mi, pa kaminda Ami ta, boso tambe por ta” (Juan 14:2-3). Pues, na morto e lo ta huntu ku Hesus. Esaki ta kita algun di e temor.

Lag'é sa e'n tin salú? Esei ta keda un desishon familiar. Ma nos ta rekomendá pa famianan i médikonan informá e enfermo pa e por prepará pa morto!

I di bèrdat, **nos tur** tin ku prepará pa pasa e ruta ei un dia. Ningun hende sa ki dia esei lo ta. P'esei nos mester ta prepará pa kontra Dios kualke momentu! Bo ta prepará pa e sita ei?